

**REPUBLIKA E SHQIPËRISË
KËSHILLI I MINISTRAVE**

PROJEKTVENDIM

Nr. _____, datë _____.2025

**PËR
PROPOZIMIN E PROJEKTLIGJIT “PËR MARRËVESHJEN E PAQES FISKALE”**

Në mbështetje të neneve 81, pika 1, dhe 100, të Kushtetutës, me propozim të Ministrit të Financave, Këshilli i Ministrave,

VENDOSI:

Propozimin e projektligjit “Për marrëveshjen e paqes fiskale”, për shqyrtim dhe miratim në Kuvendin e Republikës së Shqipërisë, sipas tekstit dhe relacionit shoqërues që i bashkëlidhen këtij vendimi.

Ky vendim hyn në fuqi menjëherë.

KRYEMINISTRI

EDI RAMA

REPUBLIKA E SHQIPËRISË
KUVENDI

PROJEKTLIGJ

Nr.____, datë _____.2025

PËR
MARRËVESHJEN E PAQES FISKALE

Në mbështetje të neneve 78, 83, pika 1 dhe nenit 155 të Kushtetutës, me propozimin e Këshillit të Ministrave, Kuvendi i Republikës së Shqipërisë

V E N D O S I:

KREU I
DISPOZITA TË PËRGJITHSHME

Neni 1
Objekti i ligjit

Objekt i këtij ligji është përcaktimi i rregullave dhe procedurave për lidhjen e marrëveshjes në mënyrë vulletare midis tatimpaguesit dhe administratës tatimore, për pagimin e tatimit mbi të ardhurat e korporatave ose të tatimit mbi të ardhurat personale nga biznesi, bazuar në vlerësimin e fitimit të tatueshëm.

Neni 2
Qëllimi i ligjit

Qëllimi i këtij ligji është të nxisë përmbushjen vullnetare të detyrimeve për tatimin mbi të ardhurat e korporatave ose tatimin mbi të ardhurat personale nga biznesi, përmes një marrëveshjeje njëvjeçare, kundrejt mosushtimit të kontrollit tatimor për këtë tatim gjatë vitit tatimor të marrëveshjes.

Neni 3
Fusha e zbatimit

1. Ky ligj zbatohet për tatimpaguesit që ushtrojnë veprimtari ekonomike në territorin e Republikës së Shqipërisë, të cilët:
 - a) janë të regjistruar në Qendrën Kombëtare të Biznesit;
 - b) i nënshtrohen tatimit mbi të ardhurat e korporatave ose tatimit mbi të ardhurat personale nga biznesi sipas dispozitave të ligjit *“Për tatimin mbi të ardhurat”* dhe nuk përfitojnë nga normat e reduktuara dhe përjashtimet sipas nenit 69 të ligjit nr. 29/2023 *“Për tatimin mbi të ardhurat”*, i ndryshuar;

- c) përmbushin kushtet dhe kriteret e përcaktuara në këtë ligj dhe në aktet nënligjore në zbatim të tij.
- 2. Marrëveshja e paqes fiskale zbatohet për një vit tatimor, me të drejtë rinovimi për dy vite tatimore.

Neni 4 **Përkufizime**

Në kuptim të këtij ligji, termat e mëposhtëm kanë këtë kuptim:

- a) “Marrëveshje e paqes fiskale” është marrëveshja vullnetare ndërmjet tatimpaguesit dhe administratës tatimore, me kërkesë të tatimpaguesit, me efekt detyrues për një vit tatimor, për vlerësimin e fitimit të tatueshëm..
- a) “Tatimpagues” është çdo person fizik ose entitet që është subjekt i detyrimit të tatimit mbi të ardhurat e korporatave dhe tatimit mbi të ardhurat personale nga biznesi, sipas legjislacionit tatimor në fuqi dhe që plotëson kushtet për të hyrë në marrëveshje.
- b) “Administrata tatimore” është Drejtoria e Përgjithshme e Tatimeve dhe strukturat e saj territoriale dhe qendrore.
- ç) “Vlerësimi i fitimit të tatueshëm ” është vlerësimi i fitimit të tatueshëm për vitin tatimor, të llogaritur sipas dispozitave të parashikuara në ligjin nr. 29/2023 “Për tatimin mbi të ardhurat”, të ndryshuar, për të cilin lidhet marrëveshja, bazuar në një përqindjeje rritjeje në krahasim me vitin paraardhës, sipas kushteve të përcaktuara në këtë ligj.
- d) “Normë tatimore e marrëveshjes” është:
 - i. përqindja standarde e tatimit mbi të ardhurat e korporatave ose tatimit mbi të ardhurat e biznesit,që zbatohet mbi fitimin e tatueshëm të vlerësuar, deri në një përqindje të caktuar rritjeje në krahasim me vitin e mëparshëm si; **rritja minimale 18 %**
 - ii. 5% për çdo rritje të fitimit të tatueshëm të vlerësuar, mbi përqindjen e rritjes së caktuar në këtë ligj.
- dh) “Rinovimi i marrëveshjes” është procedura për lidhjen e një marrëveshjeje të re vjetore, për aq kohë sa tatimpaguesi përmbush kushtet dhe kriteret e përcaktuara dhe dorëzon një aplikim të ri.
- e) “Afat i vlefshmërisë” është viti tatimor gjatë së cilës marrëveshja prodhon efektet e saj tatimore dhe procedurale.

KREU II **REGJIMI MATERIAL I MARRËVESHJES**

Neni 5 **Fitimi i tatueshëm dhe tatimi gjatë marrëveshjes së paqes fiskale**

- 1. Tatimpaguesit që realizojnë të ardhura nga veprimtaria ekonomike në territorin e Republikës së Shqipërisë dhe jashtë saj, në mënyrë vullnetare aplikojnë nëpërmjet platformës elektronike *e-filing* për lidhjen e marrëveshjes së paqes fiskale, sipas kushteve dhe kriterëve të përcaktuara në këtë ligj dhe aktet nënligjore në zbatim të tij.

2. Fitimi i tatueshëm i vlerësuar është fitimi i tatueshëm i vitit të mëparshëm i rritur me 18% në krahasim me fitimin e tatueshëm të vitit të paraardhës tatimor.
3. Tatimi mbi fitimin e tatueshëm të korporatës ose tatimi mbi të ardhurat personale nga biznesi llogaritet si shumëzim i normës sipas përcaktimeve në ligjin nr. 29/2023 “Për tatimin mbi të ardhurat”, i ndryshuar, me fitimin e tatueshëm me rritje deri në 18%, sipas përcaktimeve të pikës 2.
4. Për çdo fitim të tatueshëm që tejkalon vlerën e parashikuar sipas pikës 2 të këtij neni, zbatohet norma tatimore prej 5%.
5. Administrata tatimore, mbi bazën e formulës së vlerësimit të përcaktuar në pikët 2, 3 dhe 4 të këtij neni, harton dhe i propozon tatimpaguesit vlerën e paracaktuar të fitimit të tatueshëm, që përdoret për llogaritjen e detyrimit tatimor gjatë periudhës së marrëveshjes.
6. Detyrimi tatimor është tatimi mbi të ardhurat e korporatave ose tatimi mbi të ardhurat personale nga biznesi dhe nuk prek detyrimet e tjera tatimore.

Neni 6

Kriteret për përfitimin nga marrëveshja

Kanë të drejtën të aplikojnë për marrëveshjen e paqes fiskale tatimpaguesit që plotësojnë kushtet e mëposhtme:

- a) janë persona fizikë dhe entitete të regjistruar në regjistrin tatimor dhe ushtrojnë veprimtari ekonomike në Republikën e Shqipërisë;
- b) nuk kanë detyrime tatimore të papaguara ose të padeklaruara;
- c) nuk janë subjekt i procedimeve penale për vepra në fushën tatimore.
- d) nuk janë dënuar me vendim të formës së prerë për mashtrim tatimor, pastrim të produkteve të veprës penale ose fshehje të ardhurash;
- e) nuk janë subjekt hetimi nga administrata tatimore.

Neni 7

Detyrimet tatimore të përfshira në marrëveshje

Marrëveshja e paqes fiskale përfshin vlerësimin dhe paracaktimin e:

- a) fitimit të tatueshëm që rezulton nga veprimtaria ekonomike e tatimpaguesit;
- b) normës tatimore për tatimin mbi të ardhurat e korporatave dhe tatimit mbi të ardhurat personale nga biznesi.

Neni 8

Efektet juridike dhe kufizimi i kontrolleve tatimore

1. Gjatë vlefshmërisë së marrëveshjes, për tatimin mbi të ardhurat e korporatave dhe tatimin mbi të ardhurat personale nga biznesi nuk kryhen kontrolle tatimore në terren, përveçse rasteve kur për tatimpaguesin është regjistruar një çështje hetimore në proces, për konsumin e veprës penale të krijimit të skemave mashtruese me tatimin mbi vlerën e shtuar apo fshehje e të ardhurave, sipas parashikimeve në Kodin Penal.

2. Subjektet e parashikuara në këtë ligj i nënshtrohen monitorimit periodik nga zyra gjatë gjithë periudhës së marrëveshjes. Vlerësimi/verifikimi nga zyra për qëllime monitorimi, do të bëhen sipas ligjit nr. 9920/2008.

Neni 9

Përfundimi dhe humbja e vlefshmërisë së marrëveshjes

1. Marrëveshja përfundon në rastet e mëposhtme:
 - a) tatimpaguesi ndryshon llojin e veprimtarisë së deklaruar në marrëveshje;
 - b) tatimpaguesi nuk realizon rritjen me mbi 18% të fitimit të tatueshëm;
 - c) tatimpaguesi pezullon apo ndërpret përfundimisht aktivitetin ekonomik;
 - d) tatimpaguesi është në proces riorganizimi biznesi, bashkim, ndarje, ndarje e pjesshme, shkëmbim i aksioneve apo transferim i degëve të veprimtarisë;
 - e) ka kryer shkelje të përsëritura të detyrimeve tatimore që cenojnë ndershmërinë fiskale;
 - f) nuk paguan detyrimet sipas marrëveshjes;
 - c) nuk përmbush më kushtet e parashikuara në nenin 6 të këtij ligji.
2. Ministri përgjegjës për financat përcakton me udhëzim procedurat për zbatimin e këtij neni.

KREU III

PROCEDURA E LIDHJES DHE ADMINISTRIMIT TË MARRËVESHJES

Neni 10

Zbatimi dhe propozimi i marrëveshjes

1. Përfshirja në marrëveshjen e paqes fiskale bëhet nga tatimpaguesi përmes platformës elektronike *e-filing*, brenda afatit për dorëzimin e deklaratës vjetore të të ardhurave të vitit paraardhës, sipas legjislacionit në fuqi. Për vitin e parë tatimor të zbatimit, afati përcaktohet me udhëzim të Drejtorit të Përgjithshëm të Tatimeve.
2. Propozimi i marrëveshjes së paqes fiskale hartohet nga administrata tatimore.
3. Propozimi i formuluar i komunikohet tatimpaguesit përmes platformës elektronike *e-filing* dhe përmban vlerën e fitimit të tatueshëm, si dhe normat e detyrimit tatimor për periudhën përkatëse.
4. Procedurat për hartimin dhe përmbajtjen e propozimit të marrëveshjes, mënyrat e komunikimit me tatimpaguesin dhe konfirmimin elektronik, regjistrimin dhe ruajtjen e marrëveshjes në regjistrin elektronik tatimor, trajtimin e rasteve të refuzimit, mospranimit ose pavlefshmërisë së marrëveshjes, përcaktohen me Udhëzim të ministrit përgjegjës për financat.

Neni 11

Efektet e pranimit të marrëveshjes

1. Tatimpaguesi ka të drejtë të pranojë ose refuzojë propozimin brenda afatit të përcaktuar me udhëzim ministri.
2. Me pranimin nëpërmjet nënshkrimit elektronik, marrëveshja konsiderohet e lidhur dhe ka efekt ligjor për vitin tatimor përkatës.

3. Tatimpaguesi ka detyrimin të deklarojë dhe të paguajë detyrimin tatimor sipas marrëveshjes sipas nenit 63 të ligjit nr. 29/2023 “Për tatimin mbi të ardhurat”, i ndryshuar.
4. Të dhënat e deklaruara i nënshtrohen kontrollit nga zyra nga administrata tatimore, sipas legjislacionit në fuqi.
5. Mospërmbushja e detyrimeve të deklarimit apo pagesës, sipas marrëveshjes së pranuar, trajtohet si shkelje tatimore dhe i nënshtrohet dispozitave përkatëse të ligjit nr. 9920, datë 19.5.2008, “Për procedurat tatimore në Republikën e Shqipërisë”, të ndryshuar.

KREU IV

DISPOZITA KALIMTARE DHE PËRFUNDIMTARE

Neni 12

Marrëdhënia me legjislacionin ekzistues

1. Dispozitat e këtij ligji plotësojnë dhe nuk cenojnë dispozitat e ligjit nr. 9920, datë 19.05.2008, “Për procedurat tatimore në Republikën e Shqipërisë”, të ndryshuar, dhe ligjit nr. 29/2023 “Për tatimin mbi të ardhurat”, përveç rasteve kur përcaktohet ndryshe në mënyrë të shprehur.
2. Në rast mospërputhjeje, kanë përparësi dispozitat e këtij ligji për marrëveshjet që mbulon.

Neni 13

Aktet nënligjore

1. Ngarkohen ministri përgjegjës për financat të miratojë brenda 3 muajve nga hyrja në fuqi e këtij ligji aktet nënligjore në zbatim të nenit 9, pika 2; nenit 10, pika 4 dhe nenit 11, pika 1.
2. Ngarkohen Drejtori i Përgjithshëm i Tatimeve të miratojë brenda 3 muajve nga hyrja në fuqi e këtij ligji udhëzimin në zbatim të nenit 10, pika 1.

Neni 14

Hyrja në Fuqi

Ky ligj hyn në fuqi pesëmbëdhjetë (15) ditë pas botimit në Fletoren Zyrtare dhe i shtrin efektet nga data 1 janar 2026 deri në vitin tatimor 2028.

K R Y E T A R I

NIKO PELESHI